

आकाशवाणी

खबरां

1. प्रधानमंत्री नरेंद्र मोदी होरें भारत ते कनाडा बश्कार सरबंधें दे महत्व गी उजागर करदे होई आखेआ जे दौनें मुलखें मनुक्खी कद्रे ते लोकतांत्रिक मुल्यें गी बचाई रखने लेई कम्म करना लोडचदा।
2. कनाडा दे अलावा मोदी होरें होर कई मुलखें दे लीडरें कन्नै बी दपक्खी बैठकां लाइयां। कनाडा दा दौरा मुकम्मल करियै प्रधानमंत्री मोदी क्रोएशिया लेई रवाना।
3. जी-7 शिखर सम्मेलन च प्रधानमंत्री होरें ग्लोबल साउथ सने कई महत्वपूर्ण कुल संसारी मुद्दे गी उजागर कीता।
4. इस्राइली फौज नै ईरान च होए दे ब्हाई हमलें च अयात उल्लाह अली खामेनेई हुंदे सलाहकार ते युद्ध समें दे चीफ ऑफ स्टॉफ अली शादमानी दे मारे जाने दी तस्दीक कीती ऐ।
5. मौसम विभाग नै मेघालय, पच्छिम बंगाल दे गंगा तट आहले इलाकें, झारखंड ते ओडिशा च भारी बरखा दे असार दस्से ना।
6. भारत दे जूनियर कम्पाउंड तीरंदाजें सिंगापुर च एशिया कप लीग-2 च महिला ते पुरुष दौनें वर्गें दे फाइनल च थाहर पक्की करी लैती ऐ।

<><><><><><>

PM-Canada

प्रधानमंत्री नरेंद्र मोदी होरें आखेआ ऐ जे भारत दे कनाडा बश्कार दपक्खिया सरबंध बड़े महत्वपूर्ण न ते दौनें मुलखें गी इन्सानियत ते लोकतंत्र गी मजबूत करने लेई रलिय कम्म करना लोडचदा। कनाडा दे प्रधानमंत्री मार्क कारने हुंदे कन्नै जी-7 सम्मेलन दे मौके पर दपक्खिया गल्लबात करदे होई मोदी होरें आखेआ जे कनाडा दी मती सारी कंपनियें भारत च ते भारत दी कंपनिएं कनाडा दा निवेश कीते दा ऐ ते ओहू इस सरबंधें गी होर पक्का करना चाहंदे ना। कारनें होरें इब्बी गलाया जे भारत दा जी-7 सम्मेलन दी बैठकें च हर बारी हिस्सा लैना इस गल्ला गी दर्शादा ऐ जे भारत ते इत्थुआं दे प्रधानमंत्री मोदी होर इसी किन्ना महत्व दिंदे ना। प्रधानमंत्री मोदी होरें मुलखें, जियां के जर्मनी, फ्रांस, मैक्सिको, दक्खन कोरिया ते बाकी किश मुलखें दे लीडरें बी दपक्खी बैठक लाई। मोदी होरें ते जर्मन चांसलर Friedrich Merz होरें भारत ते जर्मनी दे बश्कार किश खास दपक्खी खेत्तरें पर सांझेदारी गी मजबूत करने पर जोर भरेआ। प्रधानमंत्री मोदी होरें आखेआ जे भारत नै ग्लोबल साउथ दी अवाज अंतरराष्ट्री मंच उप्पर पजाने दी जिम्मेदारी लेई लैती ऐ।

<><><><><><>

PM-Croashia

प्रधानमंत्री नरेंद्र मोदी होर कनाडा दी जात्तरा सफलता कन्नै पूरी करने मगरा अज्ज बडुलै क्रोएशिया लेई रवाना होई गए। उत्थे ओहू क्रोएशिया दे प्रधानमंत्री अंद्रेज पलैनकोविक ते राष्ट्रपति जोरान मिलानोविक हुंदे कन्नै मिलिए दपक्खी गल्लबात करंगन। एहू मोदी हुंदी 3 मुलखें दी जात्तरा दा त्रिया ते खीरी पड़ाव ऐ। आकाशवाणी कन्नै गल्ल करदे होई क्रोएशिया दे भारती राजदूत अरूण गोयल होरें आखेआ जे मोदी हुंदे क्रोएशिया दौरै कन्नै भारत दे युरोपियन युनियन दे मुलखें कन्नै सरबंध होर मजबूत होंगन।

<><><><><><>

PM-Tweet G-7

प्रधानमंत्री नरेंद्र मोदी होरें कनाडा दा दौरा सफलतापूर्वक समाप्त कीता। इक सोशल मीडिया पोस्ट च उनें कनाडा दे लोकें दा धन्नवाद कीता ते कनोडियन सरकार दे जी-7 सम्मेलन दी मेजबानी करने दे जत्तें दी बी सराहना कीती। प्रधानमंत्री मोदी आखेआ ऐ जे इस सम्मेलन च वैश्विक मसलें बारै फलदायक चर्चा होई ऐ ते मुलख वैश्विक शांति, समृद्धि ते स्थिरता बनाने दी बचनबद्धता लेई लगातार कम्म करदा रौहग।

<><><><><><>

Isreal-Iran

इस्राइली सेना नै ईरान च होए दे ब्हाई हमलें दौरान उत्थूं दे सब्बने शा बड्डे नेता अयात उल्लाह अली खामेनेई हुंदे करीबी सलाहकार ते लड़ाई दौरान बनाए गेदे चीफ ऑफ स्टॉफ अली शादमानी दे मारे जाने दी पुष्टि कीती ऐ। शादमानी होरें शुक्रवारें इस्राइल दे शुरूआती हमले च साबका चीफ ऑफ स्टाफ दे मारे जाने दे बाद एह ओहदा साम्भेआ ऐ। ईरान दी साइबर सुरक्षा कमान नै इस्राइल पर व्यापक साइबर युद्ध शुरू करने दा आरोप लाया ऐ। आई.आर.आई.बी समाचार एजेंसी नै जानकारी दिती ऐ जे इस्राइली हमले कारण उत्थे जरूरी सेवाएं पर बड़ा माड़ा असर पवै करदा ऐ। लड़ाई दे अज्ज 6में ध्याडे पच्छमी तेहरान च लगातार तेज धमाके दियां अवाजां सुनोचा करदियां ना।

<><><><><><>

Indian Students Tehran

तेहरान च भारतीय विद्यार्थिएं गी सुरक्षा कारणें करी शैहरा थमां बाहर भेजेआ जा करदा ऐ। विद्यार्थिएं दी सुरक्षा लेई उनें शैहरें थमां बाहर भेजने दे इंतजाम ईरानच भारतीय दूतावास नै कीते देन। विदेश मंत्रालय नै बाकी बसनीकें गी जिंदे कोल गड़ियें दी बवस्था ऐ, खास करियै उनेंगी बी शैहरा थमां बाहर जाने आस्तै आखेआ ऐ। किश भारती बसनीकें गी अरमेनिया दे बार्डर आहली बक्खी थमां ईरान थमां बाहर जाने आस्तै सूलत कीता गेआ। इस्राइल च राष्ट्र एमरजेंसी हुनै तोड़ी लागू ऐ ते उत्थे ब्हाई क्षेत्र बी बंद कीते गेदे न जेदे करी तल अवीव दे भारती दूतावास नै भारतीयें गी मुख्य छोड़ने लेई जमीन आहले रस्ते थमां जाने लेई सलाह दिती ऐ।

<><><><><><>

IMD

मौसम विभाग नै मेघालय, पच्छिम बंगाल दे गंगा नदी कन्नै सटे दे मैदानी इलाकें, झारखंड ते उड़ीसा दी बक्ख-बक्ख थाहरें पर अज्ज भारी बरखा पौने दे असार दस्से न ते अगले 2-3 दिनें दरान बिहार, छत्तीसगढ़, कर्नाटक दी समुंद्री इलाकें, गुजरात, कोंकण, गोवा, मध्य महाराष्ट्रा ते पूर्वोत्तर राज्यें दे किश हिस्सें च बी भारी बरखा होने दी मेद जाहिर कीती ऐ। दिल्ली एनसीआर च बी कल शामी बरखा पेई जेदे कन्नै लोकें गी राहत मिली। मौसम विभाग नै आखेआ ऐ जे राष्ट्री राजधानी ते कोल कश दे एनसीआर क्षेत्र च शनिवार तोड़ी हल्के थमां दरम्याने दर्जे दी बरखा पेई सकदी ऐ।

<><><><><><>

DGCA-Air India

एयर इंडिया दे नगर विमान दे महानिदेशालय यानि डी.जी.सी.ए नै एयर इंडिया ते एयिर इंडिया एक्सप्रेस दे परिचालन दी कल नमीं दिल्ली च इक उच्चे स्तर दी बैठक च समीक्षा कीती। निदेशालय नै हाल च एयर इंडिया रख-रखाव सरबन्धी मुद्दें पर चिंता जाहिर कीती ते एयिर लाइन गी अंदरूनी समन्वय जियां इंजीनियरिंग परिचालन, ग्राउंड हैंडलिंग इकाइयें ते पर्याप्त पुर्जे दी उपलब्धता गी सुनिश्चित करने लेई सलाह दिती तां जे सवारियें गी कोई मुश्कल नेई होऐ।

<><><><><><>

Archery-Asia Cup

भारत दे जूनियर कम्पाउंड तीरंदाजें कल सिंगापुर च एशियाई कप लैग्न टू च अपना दबदबा कायम रखदे होई महिलाएं ते मर्दे दौनें वर्गे दे व्यक्तिगत मकाबलें दे फाइनल च प्रवेश करी लैता ऐ। मर्दे दी व्यक्तिगत स्पर्धा च कुशल दलाल नै बंगलादेश दे हिमू बछार गी 147-143 कन्नै सेमीफाइनल च हराइयै फाइनल च अपनी थाहर पक्की करी लेई। तोआई महिलाएं दे व्यक्तिगत कम्पाउंड वर्ग च भारत दा सुन्ने दा ते इक चांदी दा तगमा पक्का ऐ कीजे शानमुखी नागा साई बुड्डे दा फाइनल च मकाबला अपने गै मुलखै दी तेजल साल्वे कन्नै होग। ते इस मकाबले च जितने आहले गी सुनने दा ते हारने आहले गी चांदी दा तगमा थोना तैय ऐ। इस टूर्नामेंट च भारतीय कम्पाउंड तीरंदाजें 21 बरें कोला हेठली उम्र वर्ग च 2 विश्व रिकार्ड बनाए।

<><><><><><>